

**आकाशवाणी**

पैहले खास-खास खबरां:-

1. प्रधानमंत्री नरेन्द्र मोदी अज्ज किर्गिस्तान च 26में शंघाई सैहयोग संगठन च हिस्सा लैडन।
2. खज़ाना मंत्री निर्मला सीतारमण होंरें आखेआ ऐ जे माली बरे 2026-27 च भारत दी आर्थिक विकास दर 7 फीसद जां ओदे शा मती रौहने दी संभावना ऐ।
3. नेपाल च चानचक्क आए दे हाड़ करी मरने आलें दी गिनतरी 794 होई गेदी ऐ जिसले के ढाई जहार शा मते लोक अजे लापता न।
4. अमरीका ने होर्मुज़ जल डमरु मध्य च स्थित लारक टापु पर ईरान दे फौजी ठिकानें पर हमला कीता, जेहदे परते च ईरान नै जार्डन च स्थित अमरीकी अड्डे पर मिसाईल दागे।
5. महिला क्रिकेट च भारत ने कल रातीं दुबई च थाईलैंड गी 94 रन्जें कन्नै हराइयें टी-20 एशिया कप-2026 दे अपने अभियान दी शानदार शुरुआत कीती।

<><><><><><>

**PM-Bishek**

प्रधानमंत्री नरेन्द्र मोदी होर दो दिन दे किर्गिस्तान दौरें पर विश्केक पुज्जी गे न। हवाई अड्डे पर उन्दा सोआगत मंत्रीमंडल दे अध्यक्ष कासिम लियेव आदिल बेक अलेशोविच होंरें कीता। उन्दे सोआगत च इक रिवायती किर्गिज नाच दी प्रस्तुति दिती गई। प्रधानमंत्री मोदी राष्ट्रपति सादिर झापारोव हुंदे साद्दे पर 216में SCO शिखर सम्मेलन आस्तै किर्गिस्तान दा दौरा करा””रदे न। किर्गिस्तान दौरें दे पैहले दिन प्रधानमंत्री मोदी

शिखर सम्मेलन दौरान SCO नेताएं कन्नै दबकखी बैठक लाडन। ओह केई सारे कार्यक्रमें च हिस्सा लैडन। प्रधानमंत्री होरें इस दौरें लेई रवाना होने थमां पैहले इक ब्यानै च आखेआ जे ओह सुरक्षा- सम्पर्क ते मौके पर आधारित क्षेत्र आस्तै भारत दे नजरिए गी अगगे बदाने आस्तै उत्सुक न। उ'नें एह बी आखेआ जे भारत आतंकवाद-अलगाववाद ते थमां मुक्त क्षेत्र आस्तै SCO सदस्यें कन्नै मिलिए कम्म करोग। प्रधानमंत्री होर 6में विश्व नोमैड गेम्स दे उदघाटनी समारोह च बी शामिल होडन।

<><><><><><>

#### **PM-Uzbekistan**

प्रधानमंत्री नरेन्द्र मोदी होरें अपनी 2 रोजा उज़्बेकिस्तान दी यात्रा सफलतापूर्वक सम्पन्न कीती। अपने दौरें दौरान उ'नें उज़्बेकिस्तान दे राष्ट्रपति हुंदे कन्नै गल्लबात कीती। 2 दिन दी यात्रा च सरबंधें गी होर मज़बूत करदे होई दौनें नेताएं भारत, उज़्बेकिस्तान दे सरबंधें गी व्यापक रणनीतिक सांझेदारी दी स्तह तगर लेई जाने पर सहमति जाहिर कीती। इस दौरान 11 समझौतें पर दस्तख्त बी कीते गे। दौनें नेताएं बपार-कारोबार गी 5 बिलियन डालर तगर लेई जाने पर बी सहमति जताई। इस दौरें दौरान प्रधानमंत्री होरें गी उज़्बेकिस्तान आस्सेआ आर्डर ऑफ ओलिय दरजाली दोस्तलिक कन्नै सम्मानित बी कीता गेआ।

<><><><><><>

#### **Finance Minister**

वित्त मंत्री निर्मला सीतारमण होरें आखेआ जे माली बरे 2026-27 च भारत दी आर्थिक विकास दर 7 फीसद जां ओदे थमां मते रौहने दी संभावना ऐ। अमरीकी दौरें दौरान

शिकागो च प्रवासी भारतीयें गी सम्बोधित करदे होई उ'नें आखेआ जे भू-राजनीतिक यक्को-तक्की ते अमरीका ईरान संघर्ष ते होर्मुज जल डमरु दे बंद होने मगरा आपूर्ति श्रृंखला च आई दी रुकावटें दे बावजूद भारत अपनी विकास गति गी बनाई रखने च सक्षम रहोग। उ'नें आखेआ जे पश्चिम एशिया संघर्ष करी होर्मुज जल डमरु मध्य च आई दी रुकावट नै शुरुआत च कच्चे तेल- पेट्रोलियम उत्पादें ते हैलें जनेई प्रमुख चीजें दी आपूर्ति गी प्रभावित कीता पर मुख्य आपूर्ति गी परतिए बरोबर करने च सफल रेआ।

वित्त मंत्री होरें इस गल्ला पर जोर पाया जे अंतराष्ट्रीय कीमतें च बड़ा मता बाददा होने दे बावजूद सरकारै सब्सिडी दे राएं करसानें आस्तै हैल दी कीमतें गी स्थिर रखेआ।

<><><><><><>

### **Nepal -Tunnels**

जंदे बुधवारें आए दे चानचक्क हाड़ दे बाद नेपाल च त्रिशुली-3 A सनें कैई पन-बिजली परियोजनाएं दी सुरंगें च फसे दे सैंकड़ा बद्दे लोकें गी बाहर कड्डने दे जतन तेज करी दिते गे न। भारत ते चीन दे माहिरें विशेषज्ञें सनें बचाऽ दल- सुरंग दे अंदर फसे दे लोकें कन्ने राबता कायम करने दी कोशश करा'रदे न पर अजें धोड़ी इस कम्मै च कोई कामयाबी नैई थहोई ऐ। लापता दस्से जा'रदे ढाई जहार लोकें चा सैंकड़ा बद्दे नेपाल दी पन-बिजली परियोजनाएं दे कर्मचारी दस्से जा'रदे न। अधिकारिक तौर पर नेपाल च हाड़ करी 794 लोकें दी मौत दी तस्दीक कीती गेदी ऐ। तिब्बत च मरने आलें

दी गिनतरी 16 ऐ जिसले के 546 लोक लापता दस्से जा'रदे न। बचा'स दल जींदे बचे दे लोकें दी तलाश च जुटे दे न।

<><><><><><>

## **Bihar Flood**

नेपाल च आए दे हाईं करी बिहार च गंडक ते कोसी नदिएं च पानी दा स्तर बदी गेआ ऐ। नदी दे बहाव गी काबू च करने आस्तै बाल्मीकि नगर बैराज दे सारे 36 गेट ते कोसी बैराज दे 20 गेट खोली दिते गे न। हालांकि पिच्छले 24 घंटें च दौनें नदिएं दे पानी दे स्तर च कमी आई ऐ। इस दौरान सोशल मीडिया पर आवा'रदी भ्रम फैलाने आहली खबरें दे चलदे सुपौल जिला प्रशासन नै साफ कीता ऐ जे कोसी नदी दा जल स्तर सामान्य रफ्तार कन्नै बदा'रदा ऐ ते कोसी बैराज पूरी चाली सुरक्षित ऐ। स्थिति पर लगातार नजर रक्खी जा'रदी ऐ।

<><><><><><>

## **US-Iran Hormuz**

अमरीका नै कल रातीं होर्मुज जल डमरु मध्य च स्थित लारक द्वीप पर ईरान दे सैन्य ठकाने पर हमला कीता। अमरीकी सेना नै दस्सेआ जे ईरान दे इस्लामिक रिवोल्यूशनरी गार्ड कोर दे सैनिकें गी होर्मुज जल डमरु मध्य च रॉकेट दागने दी तयारी करदे दिखे जाने मगरा उ'नें 2 ईरानी लांचरें गी निशाना बनाया। ईरान दे सरकारी प्रसारक IRIB नै दस्सेआ ऐ जे इस हमले च केई ईरानी सैनिक ते नागरिक मारे गे ते घायल होए। लारक द्वीप पर हमला जुलाई दे खीरै मगरा ईरान दे अंदर पैहला नेहा हमला हा जिसले राष्ट्रपति डोनाल्ड ट्रम्प होरें जल डमरु मध्य कन्नै जुड़े दे 2 हफ्ते दे

अमरीकी सैन्य अभियान गी रोकी दिता हा। इक अमरीकी अधिकारी नै आखेआ ऐ जे अमरीकी सेना क्षेत्र दी बरीकी कन्नै निगरानी करा'रदी ऐ। होर्मुज जल डमरु थमां होइए बपार दी रक्षा आस्तै त्यार ऐ। ईरान नै जवाबी कारवाई करदे होई IRGC नै अमरीकी हमले दे परते च जॉर्डन च अमरीकी ठिकाने पर बैलिस्टिक मिसाइलां दागियां। इस अभियान मगरा अमरीकी राष्ट्रपति डोनाल्ड ट्रम्प होरें ईरान गी सख्त चेतावनी दिंदे होई आखेआ जे बारुदी सुरंग बछाने च शामिल कुसै बी जहाज जा किशती गी फौरी तौर पर नश्ट करी दिता जाग।

<><><><><><>

### **Navy –Nipun**

भारती नौसेना अज्ज मुम्बई च स्थित निस्टार श्रेणी दे दुए गोताखोरी सहायता पोत-डी.एस.वी- निपुण गी बल च शामिल करने गी जा'रदी ऐ। निपुण दे बल च शामिल होने कन्नै भारत दे समुन्द्री हित आले खेतरें च बशेश अभियानें गी अंजाम देने दी भारती नौसेना दी समर्थ होर मज़बूत होग। एहदे नै भारत दी गैहरे समुन्दरै दे अंदर अभियानें ते पनडुब्बी बचाs च सहायता मिलोग।

<><><><><><>

### **Prez NIFT**

राष्ट्रपति द्रौपदी मुर्मू अज्ज नमीं दिल्ली च नैशनल Institute of Fashion Technology- NIFT दे सांझे दीक्षांत समारोह गी सम्बोधित करडन। इस मौके पर मुख्य भरै दे 18 NIFT परिसरें थमां पास होने आले विद्यार्थियें गी डिग्रियां दितियां जाडन। इस कार्यक्रमै च कपड़ा मंत्री गिरिराज सिंह ते कपड़ा मंत्रालय दिएं सचिव नीलम शमी राव

हुंदे कन्नै होर बी केंई गणमान्य व्यक्ति- गवर्नरें ते बोर्ड दे सदस्य- वरिष्ठ अधिकारी- शैक्षणिक अमला- स्कॉलर ते पास होने आले विद्यार्थी बी शामिल होगन। कपड़ा मंत्रालय दे तैहत बरे 1986 च स्थापत NIFT इक वैधानिक संस्थान ऐ- जेहड़ा NIFT कनून 2026 दे तैहत संचालित होंदा ऐ।

<><><><><><>

### Asia T-20

महिला क्रिकेट च भारत नै कल रातीं दुबई च थाईलैंड गी 94 रन्जें कन्नै हराइयै टी-20 एशिया कप 2026 दे अपने अभियान दी शानदार शुरुआत कीती। पैहले बल्लेबाजी करदे होई भारत ने तय 20एं ओवरें च 9वें विकेट दे नुकसान पर 159 रन्ज बनाए। भारत ने थाईलैंड गी 15 ओवरें ते 3 गेंदें च छड़े 65 रन्जें पर ऑल आउट करी दिता। थाईलैंड दी तरफा नन्नापत कोंचारोएनकाई ने सब्बनें शा मते 41 रन्ज बनाए। एहदे शा पैहले थाईलैंड ने टॉस जित्तियै पैहले गेंदबाजी दा विकल्प चुनेआ। भारत दी शेफाली वर्मा ने 64 रन्ज बनाइयै भारत गी शानदार शुरुआत दोआई ते उनें'''गी Player of the Match बी चुनेआ गेआ। इस जित कन्नै भारत गी टूर्नामेंट च पाकिस्तान दे खलाफ मुकाबले शा पैहले मज़बूत शुरुआत मिली। तोंआई दुबई च अज्ज रातीं 8 बजे ग्रुप-बी दे मैच च बंगलादेश दा सामना इंडोनेशिया कन्नै होग।

<><><><><><>

### ICC Women's Cricket

अंतर्राष्ट्रीय क्रिकेट काउंसल -ICC नै श्रीलंका क्रिकेट दे प्रशासन च सरकार दी दखलंदाजी दे कारण 2027 च होने आली पैहली महिला चैम्पियन्स ट्रॉफी दी मेज़बानी

दा अधिकार श्रीलंका थमां वापस लेई लैता ऐ। इक रिपोर्ट मूजब- श्रीलंका च मेज़बान मुख्य सनै 6एं टीम दे कन्नै महिला टूर्नामेंट दा पैहला संस्करण आयोजित होने आला हा पर इस फैसले कन्नै श्रीलंका दी भागीदारी बी प्रभावत होई सकदी ऐ।

<><><><><><>

## Weather

मौसम विभाग ने अज्ज ओडिशा ते छत्तीसगढ़ दे किश इलाकें च मौलेधार बरखा दी भविक्खवाणी कीती ऐ। अरुणाचल प्रदेश- बिहार- पूर्वी उत्तर प्रदेश- झारखंड- नागालैंड- मणिपुर- मिज़ोरम- त्रिपुरा ते उत्तराखंड च बी दिनै बेल्लै तेज़ बरखा बरने दे इमकान न। असम- मेघालय- पूवी मध्य प्रदेश- हिमचाल प्रदेश- जम्मू कश्मीर- लद्दाख- पच्छिम बंगाल- सिक्किम ते पच्छिमी उत्तर प्रदेश च बी अज्ज मौलेधार बरखा बरी सकदी ऐ। विभाग नै अज्ज बिहार- झारखंड- कर्नाटक- केरल- माहें- लक्ष्यद्वीप- पच्छिम बंगाल दे कन्नै लगदे इलाकें- सिक्किम ते तेलंगाना च अंधी-झक्खड़ ते बिजली मिलने दी शेंका जाहर कीती ऐ। पूर्वोत्तर- भारत- मध्य प्रदेश- मराठवाड़ा- उत्तर प्रदेश ते उत्तराखंड दे किश हिस्सैं च बी इस्सैं चाल्ली दा मौसम बने दा रेही सकदा ऐ।

<><><><><><>